

**Uunga siunnersuut: Qalerallit avaleraasartuullu avataasiorluni aalisarnermi
pisarineqartut akitsuutaat pillugit Inatsisartut inatsisaata allanngortinneqarnera
pillugu Inatsisartut inatsisaat nr. x, xXx 2015-imeersoq**
(Qalerallit immannguaannaq suliat suliarineqanngitsullu akitsuutaat kiisalu aalisakkat
ikerinnarsiortut ilaasa Tunumi pisarineqartut akitsuutaat)
(Aningaasaqarnermut Aatsitassanullu Naalakkersuisoq)

pillugu

Aningaasaqarnermut Akileraartarnermullu Ataatsimiititaliap

ILASSUTITUT ISUMALIUTISSIISSUTAA

Siunnersuutip pingajussaaneerreqarnerani saqqummiunneqartoq

Aningaasaqarnermut Akileraartarnermullu Ataatsimiititaliap suliarinninnermini ukuninnga inuttaqarpoq:

Inatsisartunut ilaasortaq Jens Immanuelson (Siumut) siulittaasoq

Inatsisartunut ilaasortaq Steen Lyngby (Atassut) siulittaasup tullia

Inatsisartunut ilaasortaq Jess Svane (Siumut)

Inatsisartunut ilaasortaq Tillie Martinussen (Demokraatit)

Inatsisartunut ilaasortaq Naaja H. Nathanielsen (Inuit Ataqatigiit)

Inatsisartunut ilaasortaq Sara Olsvig (Inuit Ataqatigiit)

Inatsisartunut ilaasortaq Peter Olsen (Inuit Ataqatigiit)

UKA 15-imi aappassaaneerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Aappassaaneerinninnermi immikkoortoq pingajussaaneerinninnissaq sioqqullugu Aningaasaqarnermut Akileraartarnermullu Ataatsimiititaliamut suliarineqartussanngorlugu innersuunneqarpoq. Siunnersuutip suliareqqinneqarnissaanut ilaatigut tunngavilersuutigineqarput erseqqissaasoqarnissaata aammalu apeqqutit ilaasa nalornissutaasut qulaajarneqarnissaasa pisariaqarnerat. Taamaattumik nutaamik naliliinissaq pisariaqartinneqarpoq.

Tamatuma peqatigisaanik Aningaasaqarnermut Akileraartarnermullu Ataatsimiititaliamit oqaatigineqassaaq inatsisissatut siunnersuummut Naalakkersuisut allannguutissatut siunnersuutaat aappassaaneerinninnermi amerlanerussuteqarfiummat.

2. Ataatsimiititaliap siunnersuummik suliarinninera

Sinerissap qanittuani qaleralinniarnermi pisat tunineqarneranni akitsuusersuinissamik siunnersuutip kingunerisaanik siunnersuutigineqarpoq avataasiorluni qaleralinniarnermik akitsuusersuineq allanngortinneqassasoq.

Allanguutip kingunerissavaa avataasiorlutik qaleralinniat pisaminnit tamanit akitsuut akiler-talissammassuk, taamaallaat avataasiorlutik aalisartut pisaasa ilaat saaniagassatut tulaanneqartussaataitasut pinnagit.

Avataasiorluni aalisarnerup akitsuusiiffigineqarnerata pisat ilaannik tulaanneqartussaasunik ilaneqarneranut taarsiullugu akitsuutip angissusia appartinneqassaaq, avataasiorluni aalisarnerup akitsuutitigut nammakkersugaanera ataatsimut isigalugu allanngortussaajunnaarlugu. Taamaaliornikkut AIS 2016-imut sanilliullugu avataasiorlutik aalisartut akitsuutitigut nammakkersugaanerisa ullumikkutut iinnarnissaa qulakkeerineqassaaq.

Sinerissap qanittuani qaleralinniarnermi 2016-imi akitsuutitigut isertinneqartussat 20 mio. kr.-it missaanniittussat taggineqarput. 2016-imi aningaasanut inatsimmi amigartoorutissatut naatsorsuutigineqartut killilersimaarnissaannik siunnersuutikkut siunertarineqartoq siunissaq qaninnerusoq isigalugu allanngunngilaq. Siunnersuutilli siullermeerneqarneranut siunnersuuteqartup saqqummiussisutaani allassimavoq partiit isumaqatigiittut 2016-ip ingerlanerani aalisarnermi isumalluutitut akitsuut aalisarnermilu inatsisit misissoqqissaarneqassasut. Aningaasanut inatsit pillugu isumaqatigiissuteqarnermut atatillugu nioqutissat naleqassusiannik misissueqqissaarnissaq akuerineqartoq majimi 2016-imi naammassineqartussatut naatsorsuutigineqartoq tamanna pillugu aalajangiinissamut tunngavissiissasoq naatsorsuutigineqarpoq.

Ull. 12. november siunnersuutip aappassaaneerneqarnerata kingorna ataatsimiititaliaq allakkiamik Aningaasaqarnermut, Aatsitassanut Nunanullu Allanut Naalakkersuisumik nassinneqarpoq. Allakkiaq taanna ilanngussatut ilanngunneqarpoq. Allakkiap ilaatigut imaraa suliap ingerlaneraniq nassuiaat ilaatigullu aalisarnerup imminut akilersinnaassusianut akitsuutip sunniutigisinnaasaasa agguaqatigiissitsinikkut naatsorsornerat.

3. Siunnersuutip aningaasaqarnikkut kingunerisassai

Naalakkersuisut saqqummiussaannit allaanerusumik naliliinissaminut ataatsimiititaliaq periarfissaqanngilaq.

4. Ataatsimiititaliap inassuteqaatai

Ataatsimiititaliami amerlanerussuteqartut Siumup, Demokraatit Atassutillu ilaasortaatai siunnersuut pillugu ima oqaaseqaateqarumapput:

Avataasiorluni qaleralinniarnermi kilomut 2,50 kr.-inik akitsuusiisoqassasoq siunnersuutigineqarpoq. Akitsuut taanna siusinnerusutulli iluarsiiisuteqartinneqartassaaq. Sinerissamut qanittumi qaleralinniarnep akerlianik avataasiorluni aalisarnerup avammut tunisinermi akit sunniuteqarfiginerusinnaavai. Avammut tunisinermi akit qaffannerat uuliallu akiata apparnera

ilutigalugu akitsuutip iluarsissuteqarfigineqartarneratigut akitsuusigassat annertunerulissaput.

Assigiimmik procentiliilluni akitsuusiineq nammaqatigiinnerunermik kinguneqartoq amerlanerussuteqartut isumaqarput, tassa tunisinermi aki annikinneruppat koruuninngorlugit akitsuummumt akiliutissat ikinnerussammata.

Aningaasaqarnermut Ataatsimiititaliami amerlanerussuteqartut Siumup, Atassutip Demokraatillu ilaasortaataa inassutigaa siunnersuut Inatsisartunit akuerineqassasoq.

Ataatsimiititaliami ikinnerussuteqartut Inuit Ataqtigiit siunnersuummumt pineqartumumt makku maluginiarpaat:

Inuit Ataqtigiit pisuussutitta uumassusilinnik akitsuusiisarneq tapersersorpaat. Pisuussutininik ataatsimoorluta pigisatsinnik inuiaqtigiinnut pissarsissutaanissaat isumaqtigaarput. Taamatulli oqareerluta nassuerutigissavarput akitsuutinik atuutitsilerneq ajornaatsuinnaasannngimmat.

Pipallatamik inatsisiliorneq isornartorsiortareerparput – aamma taamaalioqqissaagut. Piffissap annikitsuinnaap iluani inatsisiliorneq kiisalu tusarniaasarneq inatsisiliornermi kukkuluttornissamut ammaassisarpoq. Taamaattumik naatsersuutigilluinnarparput taamatut pisoqaqqissanngitsoq. Tulliani akitsuummik atuutitsisoqalerniarpat periutsit nalinginnaasut atorneqarnissaat naatsersuutigaarput kiisalu pineqartut siusinnerujussuakkut tusarniarneqartassasut. Taamatut oqareerluta maluginiarparput inatsisissatut siunnersuut siulleg taamaatinneqarmat, nutaamillu sanasoqarmat GE aamma KNAPK naammagisimaarinnittut. Kisiannili una inatsisissatut siunnersuut nutaaq isummerfissarput aamma isornartorsiorneqarmat.

Isornartorsiorneqartut ilagaat sinerissap qanittuani tunisinermi akitsuut 5%-i. Inuit Ataqtigiit isumaqarput procentinngorlugu akitsuusiisarneq iluaqutaasinnaasoq ajoquteqarsinnaasorlu, aalajangersimasumik kilomut oorinngorlugu atuutitsinissamut sanilliullugu. Procentinngorlugu akitsuusiisarneq nammaqatigiinnerusumik eqquissaaq, tassani tunisinermi akigissaarnerit akitsuummik akiliinerusassapput, akiluttortullu annikinnerusumik akiliisassallutik. Procentinngorlugu akitsuusiisarnermi aamma sunniutaa annikinnerussaaq tunisinermi akit appariaataassagalarpa. Inuit Ataqtigiilli qulakkeerusuppaat akitsuummik akiliisussaataaneq saneqqunneqarsinnaasannngitsoq procentinngorlugu atuutitsinermi, tassani sanilliullugu kilomut aalajangersimasumik akitsuuteqartitsinermit.

Akitsuutissatut siunnersuutigineqartoq qaffasippallaartutut isumaqarfigaarput. Sinerissap qanittuani aalisarnerup iluani isertitaasartut assigiinngitsorujussuupput. Akuerivarput qaleraliniartut ilaat annertuumik aalajaatsumillu isertitaqartatut. Kisiannili ilaqarput annikitsuinnarmik isertitaqartatut aningaasartuuteqangaatsiartunillu. Taakku annertuumik nammatassinneqassapput 5%-imik akitsuusiinermi. Inuit Ataqtigiitni isornartorsiuineq tusaniarsimavarput aalajangiiniarnermilu ilaatissimallugu. Aalisartunik oqaloqateqarsimavugut, ernumassutaallu tusaaniarsimallugit.

Taamaattumik inatsisissap pingajussaaneernissaanut siunnersuutigissavarput sinerissap qanittuani akitsuut 3%-imut appartinneqassasoq. Appaanermumt matussutissatut siunnersuutigissa-

varput avataasiorluni qaleralinniarnermi akitsuut appartinneqassanngitsoq Naalakkersuisut siunnersuutigisaattut, aalajangiunneqarlunili 3 kronemut. Allangortikkusunngilarput orsusap tunisallu akii apeqqutaatillugit qaammatit pingasukkaarlugit akitsuutip nikerartinneqartarnera, akueriniannngilarput avataasiorluni qaleralinniarnermi akitsuummik appaaniarnerneq sinerissap qanittuani qaleralinniarnit matussusertillugu.

Naalakkersuisut aalisarnermillu ingerlataqartut akornanni inatsisissap pingajussaaneernisnaanut isumaqatigiinniartoqalerpat siunnersuutigissavarput pisuussutit uumassusillit pillugit akitsuusiisarnerni kilomut oorinngorlugit imaluunniit procentinngorlugit akitsuusiisarnissat iluaqutaat ajoqutaallu nalilersorluarneqassasut. Kissaatigaarputtaaq isumaqatigiinniarnermi aalisarnerup iluani akitsuutit atuuttut, nalikilliliisarnermut kiisalu ilanngaait atuuttut qulaajarluarneqassasut.

Aningaasaqarnermut Ataatsimiititaliami ikinnerussuteqartut Inuit Ataqatigiitneersut inatsisissatut siunnersuut taamatut isikkoqartillugu **itigartinneqassasog** inassutigivaat.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut pingajussaaniigassanngortippaa.

Jens Immanuelson,
siulittaasoq

Steen Lyngge

Jess Svane

Tillie Martinussen

Naaja Nathanielsen

Sara Olsvig

Peter P. Olsen